

# MENARA GADING

## PENDIDIKAN JARAK JAUH

# PJJ UPM kian diminati ramai

➔ Teknik, masa pembelajaran tepati cita rasa golongan bekerjaya lanjutkan pelajaran

Oleh Fahmy Azril Rosli  
fahmy.azril@bh.com.my

► Kuala Lumpur

Universiti Putra Malaysia (UPM) kini membawa pendidikan tinggi ke rumah pelajarannya, menerusi Program Pendidikan Jarak Jauh (PJJ UPM) yang ditubuhkan sejak 1995, di bawah kendalian UPM Education & Training Sdn Bhd.

PJJ UPM membolehkan pelajarannya melanjutkan pengajian bermula di peringkat diploma, sarjana muda dan Sarjana.

Ramai individu pelbagai profesion mendaftar program PJJ UPM. Ini terbukti berikutan jumlah graduan menerusi program ini sudah mencecah 15,689 orang.

UPM Education & Training yang

sebelum ini dikenali sebagai Pusat Pendidikan Luar, bergerak seiring aspirasi Kementerian Pengajian Tinggi (KPT) dalam merangsang pembelajaran sepanjang hayat dan menghasilkan tenaga kerja yang berpengetahuan.

'Working Adult Education' adalah pendekatan utama yang digunakan PJJ UPM bagi membantu golongan yang berkerjaya mendapatkan diploma atau ijazah.

### Pendekatan pembelajaran

Pendekatan pembelajaran adalah berpusatkan pelajar yang juga dibantu melalui tutorial dan perjumpaan bersemuka.

Pelajar wajib menghadiri perjumpaan bersemuka dengan penyarah sekurang-kurangnya dua kali satu semester di kampus UPM atau melalui persidangan video.

Kelas tutorial dijalankan di pusat pembelajaran seluruh negara termasuk Sabah dan Sarawak sehingga 12 jam dalam satu semester.

Pelajar dapat berasakan sesi pengajian seperti sepenuh masa, di samping menikmati kelas tutorial dengan tutor berpengalaman mengikut format diiktiraf KPT. Ini termasuk perancangan semester bagi tugasan, peperiksaan dan aktiviti lain.

Persidangan video dikenali sebagai LIP menjadi budaya pendidikan tinggi di UPM. Sesi kuliah dirakam dan dipaparkan di laman web UPM Education & Training supaya pelajar boleh merujuk kepadanya bila-bila masa.

Permohonan kemasukan boleh dilakukan dalam talian bila-bila masa dan tiada had umur ditetapkan untuk PJJ UPM.